

Des geit's doch net



Kennat Sia da Ondrschied zwischa ra Spielzeig-eisabah ond ma Frau-busa? Geit's koin: Boides isch für 'd Kendr gmacht, abr d' Väddr spielat drmit.

Eigentlich han i den alda Witz net schreiba wella, weil i sonscht sicher wieder Leserbrief krieg. Aber en Amerika isch wieder so ebbes passiert – do haut's dr schier 's Blech weg. Des isch bei ons oifach net vorstellbar, des geit's bloß bei de doppelmoralistische Amerikaner. Dort hend se an Vier-jähriga (!) aus dr Vorschul gschmis-sa, weil er sei o'schuldigs Kendr-gsichtle am Busa von ra A'gstella von dera Schual g'rieba hot. Dui hot dem Buale allen Ernschtes „sexuelle Beläschtigung“ vorgworfa.

Do muass ma sich weniger froga, ob der Knirps frühreif isch ond tatsäch-lich lüschterne Gedanka g'het hot, sonder eher, ob dia A'gstelle von dera Schual net ganz bacha isch?!?

Bei dem kloina Dergel sott mr eher annehma, dass 'r Honger g'het hot. Immerhin wer-dat Kender en dem seim Alter en manche Kultura no g'schdillt. Bloß zur Erinnerung: Die zwoi Herzer send en erschter Linie zum Ernähra von Säugling gmacht, deshalb hoifsat dia nämlich so.

Des war dia oi Zeitongsmeldong, die mi die Tag g'schockt hot.

De ander war a Umfrage, dia dr „Stern“ gmacht hot. Dodrbei isch rauskomma, dass jeder zehnte Mensch

en Deitschland net woifß, was mr an Weihnachta feiert. Oi Prozent hot gar gmoint, des hing mit dem Winteraf-fang zamma. Ja, liebe Leut, jetzt brauchat 'r euch gar nemme wondra, warum 's koin gscheita Wenter geit. Wahrscheinlich hot 's Jesuskendle in der Krippe sei Muadr Maria (em Verständnis von de Amis noch!) sexuell beläschtigt. No hot dia sich beim himm-

lische Vaddr beschwert ond der lässt zur Strof jetzt koin Schnai meh uf d' Erde riesla. Jetzt hemm'r da Dreck!

Scheene Fäschtdääg ond a schee's Chrischtkendle wünscht Ihr Wulf Wager

